



pravosudna mreža
BOSNE I HERCEGOVINE
правосудна мрежа
БОСНЕ И ХЕРЦЕГОВИНЕ
justice network
OF BOSNIA AND HERZEGOVINA



forum građana tuzle



Helsinški odbor za ljudska prava
u Republici Srpskoj

NEWSLETTER BILTEN

Pokretanje Pravosudne mreže BiH inicirali su Forum građana Tuzle i Helsinški odbor za ljudska prava u RS, kao dio aktivnosti Projekta održivosti civilnog društva (COSP). Osnovna svrha Mreže je doprinos nezavisnosti, efikasnosti, nepristrasnosti i samostalnosti bh. pravosuđa.

| Broj 23. |

NOVOSTI

Održani seminari za pravosudne institucije „Savremno komuniciranje s javnošću“

Unapređenje transparentnosti pravosudnih institucija putem kvalitetne saradnje sa medijima

Dva jednodnevna seminara na temu „Savremeno komuniciranje s javnošću“ održana su 16. novembra u Banja Luci i 23. novembra 2016. godine u Sarajevu. Seminare je organizovalo Visoko sudsko i tužilačko vijeće Bosne i Hercegovine (VSTV BiH) u saradnji s centrima za edukaciju sudija i tužilaca RS-a i FBiH u okviru projekta „Konsolidacija i dalji razvoj pravosudnog komunikacijskog i informacijskog sistema“ kojeg finansira Evropska unija iz programa IPA 2012.

Seminara su dio širih aktivnosti koje VSTV BiH provodi u oblasti unapređenja transparentnosti rada pravosudnih institucija putem kvalitetnije saradnje sa predstavnicima medija. Seminarima se željelo ukazati na važnost i uticaj odnosa s javnošću na kreiranje mišljenja javnog mnijenja o pravosuđu, a kroz praktične radionice učesnicima omogućiti da steknu neophodne vještine za saradnju sa novinarima.

Brojni predstavnici pravosudnih institucija su pokazali interes za učešće na seminarima i edukaciju u ovoj oblasti, vjerujući da je to jedan od načina da se građanima približi način i rezultati rada sudova i generalno, unaprijedi reputacija pravosuđa u BiH.



CENTRI CIVILNIH INICIJATIVA
ЦЕНТРИ ЦИВИЛНИХ ИНИЦИЈАТИВА



Centar za promociju civilnog društva



USAID
FROM THE AMERICAN PEOPLE

U prvom dijelu seminara predstavljene su osnove strateškog komuniciranja s javnošću i medijima, reaktivni i proaktivni pristup u odnosima s javnošću kao i uloga i značaj odnosa s javnošću u sudovima. Drugi dio bio je posvećen razvijanju odnosa sa medijima i predstavljanju praktičnih savjeta za pripremu informacija za javnost, komunikacijskim taktikama u odnosima s javnošću te praktična vježba i savjeti prilikom pripreme za intervju. Na kraju seminara, učesnici su imali priliku upoznati se sa osnovama kriznog komuniciranja i naučiti kako reagovati u kriznim situacijama.

Seminari su bili namijenjeni prvenstveno predsjednicima sudova, zamjenicima predsjednika, sudijama, sekretarima suda, glasnogovornicima/službenicima za informisanje, koji žele poboljšati komunikaciju i saradnju s medijima i korisnicima sudova te povećati pristup pravdi i transparentnost pravosuđa u BiH.

Predavači na seminarima u Banja Luci i Sarajevu bile su Maja Đaković-Vidović, službenik za informisanje- portparol Okružnog tužilaštva u Banja Luci i Sanela Tunović-Bećirović, nezavisni stručnjak iz oblasti komunikacija i odnosa s javnošću iz Sarajeva.

Za više informacija molimo da se obratite Kabinetu Predsjedništva VSTV-a BiH na telefon 033 707 570. Preuzeto sa www.pravosudje.ba

Razmjena iskustva u oblasti informacijsko-komunikacijskih tehnologija između pravosuđa Ukrajine i Bosne i Hercegovine

U Predsjednik Visokog sudskog i tužilačkog vijeća BiH (VSTV BiH) Milan Tegeltija danas je ugostio delegaciju Visokog sudskog vijeća Ukrajine koju je predvodio Igor Benedysiuk, predsjednik ukrajinskog Vijeća.

Sastanak u VSTV-u BiH je održan u okviru studijske posjete delegacije iz Ukrajine bosanskohercegovačkom pravosuđu s ciljem razmjene iskustava u oblasti informatizacije pravosuđa, koja je u Bosni i Hercegovini na nivou najrazvijenih zemalja Zapadne Evrope.

Na današnjem sastanku, kojem je prethodila jučerašnja posjeta Općinskom i Kantonalnom sudu u Mostaru, uz predsjednika Benedysiuka, prisustvovala je i članica Visokog sudskog vijeća Ukrajine Tetiana Malashenkova, predsjednik Sergiy Chvankin i sudija Volodymyr Petrenko Okružnog suda Kyivskii u Odesi, direktor Državne sudske administracije Ukrajine Zenovii Kholodniuk, stručnjaci iz oblasti informacijsko-komunikacijskih tehnologija i savjetnici iz sudskog vijeća i administracije Ukrajine.

Uz predsjednika Tegeltiju, sastanku su prisustvovali potpredsjednica VSTV-a BiH Jadranka Lokmić Misirača, član Predsjedništva VSTV-a BiH Zijad Kadrić, direktor Sekretarijata VSTV-a BiH Admir Suljagić zajedno sa savjetnicima i saradnicima u oblasti informacijsko-komunikacijskih tehnologija.

Predsjednik Tegeltija je gostima poželio dobrodošlicu, istakavši „Raduje me da imamo (VSTV BiH) rezultate u oblasti informaciono-komunikacijskih tehnologija na koje možemo biti ponosni, koji nas čine liderom u ovoj oblasti ne samo regionalnim, nego i šire, i koje vam možemo predstaviti u cilju razmjene iskustva i dobre prakse“. Podsjetivši prisutne na kratak istorijat razvoja ove oblasti, takođe je naglasio da rezultati nisu ostvareni „preko noći“ i da naponi sežu još od 2003. godine kada je izrađena prva strategija za informatizaciju pravosuđa.

Predsjednik Benedysiuk se zahvalio na gostoprimstvu, rekavši da ova posjeta kroz korištenje softverskih rješenja VSTV-a BiH, pruža nove mogućnosti koje mogu biti korisne za pravosudni sistem u Ukrajini. Obzirom na globalni trend informatizacije, u kojem nema puno vremena za kreiranje novih praksi i iskustva, predsjednik Benedysiuk vjeruje da će bosanskohercegovačko pozitivno iskustvo biti moguće iskoristiti u kratkom vremenu.

Direktor Sekretarijata Suljagić je uputio riječi zahvalnosti USAID-u koji pruža podršku razmjeni iskustava između pravosuđa Bosne i Hercegovine i Ukrajine. Naglasio je veliku važnost ove posjete za dalji razvoj e-pravosuđa u Ukrajini, kao i iskustva ukrajinskog pravosuđa koja mogu biti korisna bh. pravosuđu.

Takođe je naglašeno da je informacijsko-komunikacijski sistem u bh. pravosuđu razvijen uz podršku međunarodnih donatora, od kojih prema visini uloženi sredstava prednjači podrška Evropske unije.

U nastavku sastanka gostima su prezentovana informatička dostignuća bh. pravosuđa u periodu od 2013. godine do danas. Takođe je predstavljen pravni okvir za implementaciju Sistema za automatsko upravljanje predmetima (CMS) i e-sudove, te tehnički aspekti CMS sistema poput aplikacija, servera baze podataka, kapaciteta za pohranu, modula za skeniranje sistema i drugih aspekata.

Posjeta ukrajinske pravosudne delegacije će biti okončana sutra kada će se sumirati prikupljena iskustva i razmotriti modaliteti dalje saradnje.

VSTV BiH započeo pilot projekat specijaliziranih seminara za rukovodioce sudskih odjeljenja

Za Liderstvo i vještine komunikacije

Visoko sudsko i tužilačko vijeće Bosne i Hercegovine (VSTV BiH) je ove sedmice započeo sa implementacijom pilot projekta specijaliziranih seminara za rukovodioce sudskih odjeljenja. Održana su dva dvodnevna seminara na temu „Liderstvo i vještine komunikacije” koje je organizovao Institut za edukaciju sudija Nizozemske.

Seminari su održani u okviru Projekta unapređenja efikasnosti II (Projekat) kojeg finansiraju vlade Norveške i Nizozemske, a kojeg implementira VSTV BiH u saradnji s Općinskim sudom u Sarajevu i Okružnim sudom u Amsterdamu.

VSTV BiH je nakon višemjesečne provedbe aktivnosti unapređenja strateškog i operativnog upravljanja u Općinskom sudu u Sarajevu, ciljnog suda Projekta, te analizom stanja prepoznalo potrebu za uvođenjem specijaliziranih seminara za rukovodioce sudskih odjeljenja s ciljem unapređenja njihovog rada a zatim i ukupnog učinka suda. Svrha prvog seminara za rukovodioce sudskih odjeljenja bili su podizanje svijesti o prednostima timskog rada, povećanje saradnje između samih rukovodioca odjeljenja i to korištenjem različitih tehnika i vještina komunikacije, poboljšanje kvaliteta odnosa između rukovodioca sudskih odjeljenja i sudija kao i poboljšanje kvaliteta rada sudija analizom njihovog rada.

Drugi seminar bio je namijenjen jačanju kapaciteta i osposobljavanju potencijalnih rukovodioca sudskih odjeljenja. Edukatorica na seminarima je bila gđa Rosemarie Smit-Bertens, stručnjak iz Instituta za edukaciju sudija Nizozemske. VSTV BiH će se zalagati da se seminar na ovu temu uvrsti u redovan program obuka centara za edukaciju sudija i tužilaca Federacije Bosne i Hercegovine i Republike Srpske s ciljem razvoja i jačanja kapaciteta i vještina nosioca pravosudnih funkcija. Kao i u prethodnom periodu, VSTV BiH će raditi na unapređenju i postizanju boljih rezultata rada pravosudnih institucija.

Preuzeto sa <http://vsts.pravosudje.ba/>